

Buki di Festival Voz-i-Landia pronto riba mercado



ORANJESTAD – Jenny Laclé-Boezem lo ta e autor di un buki cu pronto lo ta riba mercado. E obra aki ta rescata e memoria y duna homenahe na tur persona cu a sostene y aporta na e realisacion di e Festival Voz-i-Landia, durante mas cu 35 año.

E obra aki ta lanta un gran interes ya cu e festival aki a bira un plataforma pa stimula varios hoben di scol basico

di Aruba, entre nan Cesar Olarte, pa demostra nan talento den canto, pero tambe e festival aki a contribui grandemente pa promove e idioma Papiamentu cu cancionnan autentico den nos lenga materno. E festival a inspira diferente persona pa demostra nan talentonan creativo como cantante, musico, compositor, arreglista y maestronan basico di scol.

E docente di musica, sra.

Laclé-Boezem a fungi como presidente di fundacion Festival Voz-i-Landia Escolar for di 1982 te cu 1995, caminda den su obra e ta duna su propio interpretacion di e festival. Tambe riba e forma den cual su persona a experiencia e festival aki, ya cu el a traha activamente den e organisacion, coordinacion y ehecucion di e programa di Voz-i-Landia.

Aunke sra. Laclé-Boezem ta

den e proceso final pa bin cla cu e obra aki, e kier pa unabes cu e buki aki ta cla, e por bira realmente un fuente di informacion y di consulta amplio y detaya. Pa tal motibo e ta haci un apelacion na publico pa bin cu mas informacion adicional. El a splica cu ta trata di ganadonan di bos prome luga, bos di dos luga y bos tercer luga. Cancion prome luga, cancion di dos luga y ganado popular.

Mayornan di e participantenan cu a gana den un di e festivalnan por fabor tuma contacto cu Jenny. Bo aporte lo ta valioso pa enrikece ainda mas e contenido di e buki aki. Ya practicamente e buki ta cla. “Pa mi ta sumamente importante pa mi por haya informacion, pasobra mi kier inclui tur mucha”, sra. Laclé-Boezem a bisa.

Tur persona cu por tin datonan relevante relaciona cu

e resultadonan di e gran final di e añanan cu a wordo organisa e festival, por fabor tuma contacto cu Jenny riba cel 742-6274 of 586-8998 of via e-mail jenny_mirto@hotmail.com

E ta un buki di alrededor di 160 pagina dedica na e memoria di e festival Voz-i-Landia Escolar. E ta conta origen, desaroyo y propagacion di e festival aki. Tempo cu nan a organisa e prome festival na año 1982 tur tabata personal escolar cu tabata traha na Fatima College, asina Eddy Marchena, kende ta ex cabesante di e scol aki, a declara. Ivi Raven kende tabata parti di e comision fundado di e Voz-i-Landia, a expresa su satisfaccion cu e realisacion di e obra aki como un persona cu experticio el a yega di contribui den e realisacion di e festival aki.

